


亳州志

22.6523  
0032.073  
:2

Kodak Color Control Patches



亳州志卷一

封授正一品花翎四品銜升缺用亳州知州

輿地志 星野

五星分野

星經云鎮星主嵩高山豫州


按星經歲星主青徐兖三州太白主秦雍益三州辰星主冀幽并三州惟鎮星獨主豫州似于地為狹亳屬豫分自當以鎮星為主也

十二次分野

左傳襄九年晉士弱曰陶唐火正閼伯居商邱故商王大火

易氏曰大火宋之分星豫州之星土

周禮保章氏注堪輿雖有郡國所入度非古數也今其存可



言者十二次之分也如元枵為齊姬訾為衛之類大火宋也魏陳卓云房心宋豫也自氏五度至尾九度辰在卯按分野

十二之星配十二州之地十二次所屬之星皆二十八舍之經星也經星亘古不移十二州之地離合不一以後人而定古時之疆域不能無差必先審列國之輿地明其界限彼此畫定而後于十二次之度數始無乖謬即如房心屬豫州宋之分野夫人皆印之矣然自漢以來宋地之界限終未有知之真者何論其所配之度數乎按班固地理志稱宋地分野今之沛梁楚山陽濟陰東平及東郡之須昌壽張皆宋分也後世攷宋地者皆遵是言矣然其上文論魯之分野有云漢興以來魯東海多至卿相東平須昌皆在濟東非宋地也是東平須昌疑屬魯境班氏存而不去者蓋疑而不敢決也後又云濟陰定陶詩風曹國也武王討弟叔振譯其後稍大得山陽陳留二十餘世為宋所滅夫宋既滅曹則陳留郡之地自當為宋有班氏通列諸郡而未及陳留蓋以陳留既列于魏不知宋既滅之後陳留乃為魏地而其先固宋境也及齊楚魏滅宋三分其地楚始得其沛魏始得其梁陳留何以宋之域分不載陳留而載于魏也是當列而偶忽之也固且如

者矣此何况其他甚矣地理之難也然世論宋分野乃即戰國時言之春秋時境不能若是之廣是蓋宋元王及王偃創霸時所併吞者也晉天文志陳留入亢五度濟陰入氏一度東平入氏七度是宋之境而以爲鄭之分野其分析亦有不可解

二十八宿分野

史記天官書二十八舍主十二州又云角亢氏兖州房心豫

州漢書地理志宋地房心之分野也按亳州星野歷代史志皆專屬之於宋然核其

實竊有可疑毫之先本為陳地春秋時毫為陳焦夷二邑楚滅陳後地屬于楚漢地理志明云為楚所滅陳雖屬楚于天

文自若可見陳見滅於楚猶不能奪其地之分野况毫本為陳地並非宋界而乃專屬之于宋是何故耶况以道里考之

姑勿論地本陳邑即以隣國論毫與宋雖近尤不若與陳近今毫治去睢陽尚有一百二十里漢地理志云陳國今淮陽

之地攷漢淮陽國即歸德府陳州府以南之境而淮陽國之苦縣即鹿邑縣也毫去鹿邑縣治僅六十餘里是非毫界之

距陳尤近於宋乎然於分野不入陳而入宋究何謂也且陳之分野與韓地同一星分見于班氏地理志安見毫之星野不可入陳也以爲陳小國耶不足以為星野然則鄭非小國乎何以當壽星之次嘗試攷之漢地理志云魯宋皆大國故自爲分野又曰韓地角亢氏之分野也又曰詩風陳鄭之國與韓同星分焉夫班氏取三統歷十二次配十二野其于十二次之度數先儒皆以爲言之甚詳然以陳鄭合于韓地同一星野皆主豫州固未嘗蔑棄夫陳也魏太史合陳卓分十二次以列郡國所入宿度於是始去韓而存鄭去陳而存宋然其始不自陳卓蔡邕月令章句已如此矣意者陳滅已久而陳之國都已爲楚頃襄王所居雖天文自若而地非已有宋至戰國時疆宇頗拓沛郡本爲宋得故遂以陳之分野併入宋與然鄭爲韓滅韓大鄭小何以改韓存鄭也曰戰國未韓之別郡上黨已降于趙矣宏農郡之地大半入于秦所得者僅宜陽新安二縣而已潁川郡之舞陽鄧許諸縣皆爲魏有韓之本境多失其僅存者唯所滅之鄭地爲多耳故國名不復從韓而但從鄭也然卓雖去韓存鄭而韓之地不併于鄭雖去陳存宋而陳之地盡併于宋何以見之夫潁川之境屬韓房心之次屬宋觀卓所列宿度潁川入房一度是韓亦併于宋矣淮陽入心一度是陳盡併于宋矣至鄭地本在豫

能強爲解者矣

北斗七星分野

郡國志引星經云北斗第七星爲豫州常以五午日候之甲

午爲潁川壬午爲梁國丙午爲汝南戊午爲沛國庚午爲魯

國凡五郡按後漢時方有沛國之稱司馬彪郡國志譙縣屬沛國然則毫爲沛國地其占候自當以戊午日也

周禮正義引春秋緯文耀鉤曰外方熊耳以至泗水陪尾豫

州屬搖星

史記天官書北斗七星所謂璿璣玉衡以齊七政用昏建者杓杓自華山以西南夜半建者衡衡殷中州河濟之間平旦

建者魁魁海岱以東北按亳屬中州地當以衡爲占然杓端之部位各主分野一定不移者也如昏建杓夜半建衡此七星之運動隨所指之時以占分野也

三台分野

宋史天文志三台六星上台上星主兗豫下星主荆揚中台上星主梁雍下星主冀下台上星主青下星主徐按亳屬豫地其占當在上台之上星

四宮分野

天官書東宮蒼龍房心南宮朱鳥權衡西宮咸池北宮元武又云宋鄭之強候在歲星占于房心按五星分野宋鄭屬豫州當候在鎮星今云候

在歲星者以房心屬東宮蒼龍之次歲星主東方此以四方之宮位論分野不必拘定星經之五星也然則亳爲宋分以五星論之宜候鎮星以四宮之部位則分野又宜候歲星也

天市垣東西二藩分野

宋史天文志天市垣二十二星在房心箕斗內宮之內東藩十一星南一曰宋二曰南海三曰燕四曰東海五曰徐六曰吳越七曰齊八曰中山九曰九河十曰趙十一曰魏西藩十一星南一曰韓二曰楚三曰梁四曰巴五曰蜀六曰秦七曰周八曰鄭九曰晉十曰河間十一曰河中象天王在上諸侯朝王王出臯門大朝會西方諸侯在應門左東方諸侯在應門右其率諸侯幸都市亦然按亳界于東藩當屬第一星西藩當屬第三星

之梁分梁宋之  
交豫之星土也

畢昴二星分野

天官書昴畢間為天街其陰陰國陽陽國又云自河山以南  
者中國中國于四海內則在東南為陽陽則日歲星熒惑填  
占于街南畢主之其西北則貉與月氏諸衣旃裘引弓之民  
為陰陰則月太白辰星占于街北昴主之按亳介豫土之東  
南屬天街之陽國

其占同以  
畢為主也

司空分野

晉書天文志五車者五帝車舍也五帝坐也西北大星曰天  
庫主太白主秦次東北星曰天獄主辰星主燕趙次東星曰

天倉主歲星主魯衛次東南星曰司空主填星主楚次西南

星曰卿星主熒惑主魏五星有變皆以所主占之按隋志宋  
志皆以為

言楚則吳越在其中愚謂司空主填星主楚夫填星乃豫州  
之主星言主填星則楚所兼者已有豫州之地非僅吳越已  
也蓋楚本兼有豫境戰國時楚既滅越又北併陳蔡兩國又  
與齊魏滅宋王偃全有沛郡地亳州本屬沛郡故分野雖在  
豫亦兼可屬楚故言主楚  
則豫與吳越皆在其內矣

十二國十六星分野

宋史天文志十二國十六星在牛女南近九坎各分土居列

國之象

隋書天文志九坎九星在牽牛南九坎東列星北一星曰齊  
齊北一星曰趙趙北一星曰鄭鄭北一星曰越越東一星曰

周周東南北列二星曰秦秦南二星曰代代西一星曰晉晉北一星曰韓韓北一星曰魏魏西一星曰楚楚南一星曰燕

按亳州星分當以楚星爲主

十千分野

天官書甲乙四海之外不占丙丁江淮海岱也戊巳中州河

濟也庚辛華山以西壬癸恒山以北按亳爲中州地其占候自當以戊己之日爲主

淮南子甲齊乙東夷丙楚丁南夷戊魏己韓庚秦辛西夷壬

衛癸越按淮南子之言不同于史記然以十千論之亳州之

穎川東接汝南與亳相近占用巳日其分在韓亦不出中州內既有合於史記又與淮南之言不相背也

十二支分野

淮南子云子周丑翟寅楚卯鄭辰晉巳衛午秦未宋申齊酉

魯戌趙亥燕按亳占當用未日

雲漢分野

唐天文志天下山河之象存乎兩戒觀兩河之象與雲漢之所始終而分野可知矣

踰析木津陰氣益降進及大辰升陽陽氣究而雲漢沈潛於

東正之中故易雷出地曰豫龍出泉爲解皆房心象也

自析木紀天漢而南曰大火得明堂升氣天市之都在焉其

分野自鉅野岱宗西至陳留北負河濟南及淮皆和氣之所

布也按亳地正在鉅野睢陽之南陳留之東南淮水之北得雲漢之升氣上與天市垣之部次相直



七國之初天下形勢雌韓而雄魏其後魏徙大梁則西河合于東井秦拔宜陽而上黨入於輿柳戰國未滅呈家之言屢有明效今則同在畿甸之中而或者猶據地理志推之是守甘石遺術而不知變通之數也又古之辰次與節氣相係各據當時歷數與歲差遷移不同今更以七宿之中分四象中位自上元之首以度數紀之而著其分野竊思分域之離合必本之漢志而後知沿革之由來星度之疎密則後人勝於前人以歲差節氣今昔不同至一行所論星度域分至為精悉其言多有可據然則臺固屬房四度而一行屬之心分其說自可並從也曰臺於房心可以兩屬子竟並存其說有徵乎曰自古之占房心者皆統言宋地於亳州未嘗專指惟晉天文志於沛有房四度之言唐一行有尚亳心分之說然亦無所徵驗今請一言斷之湯為諸侯時實居南亳之境五星聚於房而湯遂有天下此房星專應於亳者也魏武生於譙漢初平元年四星聚於心而魏武遂以兗豫起事克成王業此心星專應於亳者也然則論亳州之分野度數或屬之房或屬之心皆自明驗不必執一也

### 元史分野為氏二度皇輿要覽又云在氏一度

天文分野書氏房心宋分野按史漢以下皆以房心為宋分野唐以下多以氏房心為宋分野野敢問何從曰費直陳卓論宋分野皆起氏至尾不專言房心也但以房心為主耳至一行則直以氏房心三星屬豫州之宋次而但以角亢壬亮州於是鄭之分野唯二星而宋之分野有三星矣歷代史志每多宗之然一行精於天文言必據有

### 四正中星

唐律歷志云李淳風說曰若冬至昴中則夏至秋分星火星虛皆在午正之西若以夏至火中秋分虛中則冬至昴在巳正之東互有盈縮不足以為歲差是又不然今以四象分天北正元枵中虛九度東正大火中房二度南正鶉火中七星七度西正大梁中昴七度按一行以四正分天之二十八宿故其言曰以七宿之中分四象中

位自上元之首以度數紀之而著其分野所謂四正者東方七宿為東正北方七宿為北正西方七宿為西正南方七宿為南正東正之中為房北正之中為虛西正之中為昴南正之中為七星亳州在房之末心之初猶得為東正之中位也

### 中星四時進退

唐律歷志又云春分南正中天秋分北正中天冬至之昏西正在午東十八度夏至之昏東正在午西十八度冬至日在虛一度則春分昏張一度中秋分虛九度中冬至胃二度中昴距星直午正之東十二度夏至尾十一度中心後星直午西之十二度四時之進退不逾午正清風以為不叶非也按星之次以四時進退論之夏至之昏房心皆不出午正之西况尾星亦大火之次晉天文志已著明矣唐一行又以貞元八年日食在尾六度為宋分然則宋之域分為東正之中矣毫於星野亦在午正之中而畧近於西者也

### 氏房心去極遠近

氏四星十六度舊去極九十四度今九十八度

房四星五度舊去極一百八度今一百十度

心三星五度舊去極一百八度今一百十一度按一行所測氏房心距極

度數較前稍密并附於此以資考測

### 各次距度之不同

漢劉歆三統歷自氏五度至尾九度為大火

費直說周易自氏十一度至尾八度為大火

蔡邕月令章句自亢八度至尾四度為大火

皇甫謐帝王世紀同三統歷

北魏李業興正光歷自亢三度至心四度為大火

唐一行大衍歷自氏二度餘千四百十九秒五太至尾六度為大火

宋皇居卿元祐觀天歷自氏三度少至尾八度為大火

南宋楊忠輔紹熙統天歷自氏一度七十四分五十一秒至

尾二度八十六分六十四秒為大火

元耶律楚材西征庚午元歷自氏一度七十七分七十七秒

至尾三度九十九分七十二秒為大火

許衡郭守敬授時歷自氏一度十四分五十二秒至尾二度

一分十五秒為大火

天文分野書自氏二度至一度為大火

各舍赤道距度之不同

漢洛下閎所測氏十二度房五度心五度

唐一行所測同

宋皇祐所測氏十六度房五度心六度

元豐所測房六度心六度

崇寧所測房五度心六度少

元至元所測氏十六度三十分房五度六十分心六度五十

分

各舍黃道距度之不同

後漢永元銅儀房五度心五度

隋劉焯皇極書同

唐一行大衍書氏十五度太心四度太房五度同永元

宋紀元書氏十六度少房五度太心六度

金趙知微書同

元授時書氏十六度四十分房五度四十八分心六度二十

七分

明史天文志直隸潁州之亳縣皆房心分

星野所配郡國異同

江南通志云星野分配郡國亦多異同晉志以沛國譙郡屬

豫州以彭城屬徐州隋志以譙郡屬豫州豐沛屬徐州唐志

以楚國豐沛皆為大火與漢志合又史漢以房心為豫州奎

婁為徐州

天文分野書謂宋得徐州之地為多遂改大火為徐今攷宋

地實在徐豫之境也按楚國豐沛本係宋地自當歸大火之

志合乎其改屬者妄耳攷漢地理志宋之域分得沛與陳留

山陽濟陰等郡梁楚東平等國及東郡之須昌壽張二縣梁

國陳留郡之地盡屬豫州沛郡屬徐豫者各半唯楚國七縣

全屬徐州治在彭城其他如山陽郡之境今歸德府以東至

山東兗州府之西是也東平國之境今兗州府之濟寧東平

二州是也其在東平汶上鉅野以東者屬徐在東平汶上鉅

野以西者屬兗濟陰郡之境今曹州府北至東昌州之濮州

昔屬豫蓋豫徐之交以古濟水分界在濟東者為徐濟西者為豫而濟西之北則又為兗鄭漁仲曰岱山以北濟東為青岱山之陽濟東為徐呂氏春秋泗上為徐州泗之源委不出於徐然則環泗水之境皆徐分也不必更侵他州宋之分野於豫徐之外又得兗域其境之所及得徐州者不及豫州之廣豈可以宋得徐州為多而遂改徐州為大火耶通志謂宋兼徐豫之境蓋調停之言而不能正其誤其實宋兼得兗豫徐之域也○曰陳卓十二次度數雖起氏至尾而所入宋郡國度分專用房心而不及氏唐一行論宋分野則直以氏房心為大火必增一氏宿何也曰陳卓既以角亢氏屬鄭主兗州矣而宋之域分既兼有兗境故宜兼占氏星也且鄭之本國在河南與宋同為中州之域故於星野有可以互混之理况太史公云宋鄭之強占在房心房心專主宋而鄭與宋同占此星可見宋鄭俱有相兼之徵一行之言不我欺也○又按隋書齊武平三年八月癸未填星豳星太白合於氏宋之分野占曰其國內外有兵喪收立侯王以氏為宋分野隋書已有此言不惟一行之創見也

蕭山蔡必達云亳州在淮宋之間舊志但言入氏房心二度

而未有定指查天文志氏星在河南兗州房心在周鄭諸地心星在歸德宋野氏房心俱屬東方七宿而心更橫參東南周宋魯同在中州而周魯較居西北宋之分野似應專在心之一宿也攷春秋宋景公時熒惑守心當日占者俱以為景公憂唐天寶末年天狗入心未幾睢陽有尹子奇之變明崇禎末年天狗又入心歸德旋遭流賊之慘此其明證也亳北距歸德城百里同為商之都邑武王克商封微子於宋封神農後於譙封國殊名其屬宋地後代或附開封或附歸德至明改屬江南總以宋為分野與歸德共一心宿似無疑義再攷天文志淮陽入心一度夫淮宋皆入心分則在淮宋之中

者更可知矣但度分秒忽積之則有歲差今據時憲書攷正當入房四度要之既入房則非心既入心則非房與氏未有

可以混言氏房心者按蔡必達言毫當入心星度分不為無見然以房心為在周鄭諸地則舛謬已

極周地乃張與七星之分野鄭地乃角亢兼氏之分野奈何

以房心屬之耶又謂宋魯同在申州而周魯較居西北周地

於中州固在西北而魯乃更在中州之東何得云俱在西北

耶至以宋地為專在心星似為近理而亦不免於一隅之見

目謂入房則不得入心心則不得入房不知星象雖有定

指天道變應無方凡兩星相接彼此互驗占房者即可占心

占心者即可占房何以徵之前漢書陽朔元年七月壬子月

犯心星占曰房心為宋今楚地十一月楚王友薨是時楚都

在宋其應在心星矣而陽朔九年客星出牽牛至房南牽牛

主吳越房心主宋後廣陵王荆楚王英謀逆事覺自殺楚都

司在宋地何以前應心星而此時又應房星也又宋武帝永

初二年六月月犯房占曰將相有憂豫州有災其年廬陵王

義直廢是時義真領豫州是應在房星矣而後漢鄧太后臨

朝時月犯心後星心為宋五月沛王牙薨沛即豫州地何其

應又在心星也可見房心同為宋之分野占應共之故劉裕

封為宋公其年歲星留房心之間毫州於宋分所入之地無

多房之四度與心之一度相去亦無幾何必為之分畫况湯

居南亳魏武生於譙皆在今之亳地而星之符應或在房或

在心尚不專在一星今必拘定亳州之分野為在房者固非

而必拘定在心者亦非也蓋星變無常故星野亦不可執唯

明者可與言此膠柱之論不足為據矣

附占驗異同按氏房心雖屬宋分而其占亦有不用分野者蓋氏為宮室后妃之府房為明堂天子布政之

宮又房為將相心屬天王故七曜之變見此三星或往在應

在朝廷而不在分野如魏明帝太和五年熒惑犯房占曰將

相有憂其七月車騎將軍張郃追諸葛亮為亮所害晉惠帝

光熙元年熒惑守心填星守房心占曰土守房多禍喪守心

國內亂是時大司馬東海王越秉權終以無禮破滅天下內

亂之應也齊文宣帝天保元年十二月甲申熒惑犯房北頭

等一星及鈞鈴占曰大臣有反者其二年二月壬申太尉彭

樂謀反誅此占在朝廷而不必拘定於各國之分野也其占

在分野有一星而所應之地多者如宋孝武孝建三年八月

甲午太白入心占曰後九年大饑至大明八年東土大饑民

死十二三一心星之變不足以該宋地而東土之災可盡用  
以為占此星少而應地多也有星多而應亦廣者如宋明帝  
時月犯心熒惑犯氏太白入氏十一日太白犯房其後失淮  
北四州及淮西六郡之地氏房心宋之全分盡得中州之地  
故齊豫全失先為之兆此星變多而所應之地廣也其有變  
見房心而應在他州如隋志梁天監二年月犯心占曰有亂  
臣其四年交州刺史李凱舉兵反宋志大明二年熒惑犯房  
及鈞鈐占曰有兵其年索虜寇歷下孝武本紀云是冬索虜  
寇青州刺史顏師伯頻大破之是變見豫州分野而應在交  
州與青州也又有星變不在朝廷不在分野而應於物類者  
如魏顯祖天安元年八月太白犯房占曰霜雨失節馬牛多  
死房為天駟故災及良馬此房星之雜驗也者大抵天道善  
變星占不一其分野異同之故又因所值  
之日為斷此尤不可偏於一隅之見矣

### 疆域

亳州封域西北狹而東南廣東南二界屬安徽潁州府西北  
二界接河南歸德府東至渦陽舊志東至蒙城又東連宿州  
南至太和西至鹿邑北至商邱又東南至阜陽西南至太和  
西北至鹿邑東北至永城地居省城之北隅鄭志云古譙之  
疆域廣矣渦曲  
流星毓秀元宮抗節躡師流風如在版圖所屆故老猶能言  
之自鄭縣省入永城衛真併歸鹿邑而西北之境稍仄然迤  
邐東南郵符傳騎尚俟信宿而達視古之大國且廣有半焉  
接任志云今亳州實得漢三縣之地謂譙及城父扶陽也譙  
與城父在今亳境夫人知之而扶陽宜為亳地自來無識之  
者考漢地理志譙城父扶陽三縣皆屬沛郡元和郡縣志城  
父縣扶陽故城在縣東北三十六里漢韋賢封邑太平寰宇  
記亦云扶陽在城父縣東北三十六里韋賢封於此茲按毫  
東南七十里即城父地由城父西南五十五里方為阜陽界  
由毫城而東一百十五里方為蒙城界漢扶陽縣在城父東

北僅三十六里然則越扶陽以外其東北之地尚在亳界而况三十六里之近乎然自分設渦陽今其地當屬渦陽即亳之東南亦僅得城父之西南隅而其東及北則非亳所有也蓋視當日之幅員為少狹矣

南北袤一百二十里舊志作一百二十里通志作一百二十五里東西廣一百三

里舊志廣一百六十里東至沙土集迤東渦陽縣界六十三里舊志東至雒河

集蒙城縣界一百十五里又東東南至高公廟阜陽縣界一

百二十里舊志至小閻家集阜陽縣界一百八十里南至肥河集太和縣界七十

里通志作七十五里西南至梅城集鹿邑縣界四十里西至薛家廟

鹿邑縣界四十里西北至孫家店鹿邑縣界五十里北至土

牆村尚邱縣界五十里東北至永清集永城縣界四十五里

舊志云至潁河集永城縣界四十五里北拱 京師一千五百六十里東南至

江甯府省城七百五十里南稍東至安慶府省城九百四十

里南至潁州府城二百四十里按亳境在古時東接沛郡之扶陽山桑南接汝南郡之細

陽汝陽西接淮陽國之苦縣北接梁國之睢陽又北接沛郡之建平又西北與穀熟為界又東北接沛郡之鄆縣又東北

連銜縣蓋周圍犬牙相錯者共二郡二國之地

元和郡縣志西至陳州二百里正南微東至潁州二百六十

里西北至宋州一百四十里東北至徐州二百九十里

太平寰宇記西至東京四百八十六里西至長安一千七百

四十里東至徐州五百里正南微東至潁州徑路二百六十

里西至陳州二百里正東至泗州三百四十里東北至徐州

同上按今亳城南至潁州府城實二百四十里而元和郡縣志及寰宇記皆云二百六十里北至宋州實一百二十

里而郡縣志寰宇記皆云一百四十里古今里數廣狹微有不同不足為異也

江南通志亳州東一百二十里至蒙城縣界西三十里河南

省鹿邑縣界南八十里至阜陽縣界北三十里至河南省商

邱縣界按今亳境東五十五里沙土集至渦陽縣界去蒙城尚遠北五十里入商邱縣界西四十里入鹿邑縣界

通志均作三十里與今里數不合至謂南八十里至阜陽縣界則尤誤也考州南七十里肥河集方是太和縣界八十里

乃太和境耳安得至阜陽耶當是南七十里太和界之誤

潁州府志亳東西一百六十里南北一百三十里南到府城

二百四十里東至蒙城縣界西至河南歸德府鹿邑縣界南

至阜陽縣界北至河南歸德府商邱縣界東南至蒙城縣界

東北至河南歸德府永城縣界西南至太和縣界西北至河

南歸德府鹿邑縣界按今亳境東南一百三十里東至渦陽縣界東南至阜陽縣界餘與府志同

水路由渦河西至懷家溜鹿邑縣界入境三十里東至沙土

集迤東渦陽界六十三里出境舊志云東至草橋蒙城縣界一百六十三里出境

肥河自太和縣至州之西南肥河口入境迤東至高公廟出

境以達阜陽舊志云迤東至闔家集出境入阜陽縣春夏間可通舟楫約計六十餘里

都邑

高辛氏國邑

按舊志皆以高辛氏都亳為在今亳州非也帝嚳之都在河南偃師之亳與此無涉惟初封

諸侯其國邑實在穀熟縣之南亳乃為此州境內耳元和郡縣志云高辛氏故城在穀熟縣西南四十五里帝嚳初封於

此太平寰宇記亦同然則南亳之地乃高辛為諸侯時受封之邑非有天下時之都也舊志因古說而不免附會耳

成湯居亳時為國都

按湯居南亳在穀熟縣西南三十五里穀熟省入商邱縣今其故址為穀熟集

去商邱城四十里由穀熟集而南三十里已入亳境自宋家集等處至穀熟集亦止三十里則湯所居之南亳在今亳境

無疑詳見於後

亳都攷

湯居亳之地有三前代聚訟不已迄今尚無定論以亳都為在河南偃師之尸鄉者漢書地理志之說也是謂西亳鄭康

成孔穎達司馬貞皆從之以亳都爲在濟陰之薄縣者臣瓚及杜預之說也是北謂亳一曰蒙亳近世儒生之解多從之以亳都爲在宋州穀熟者皇甫謐之說也是謂南亳水經註括地志以下皆從之三家之說各有証據而于當日之情勢及各國之地形參攷互證其理不能相通於是歷代志家及言地學者或偏主一說而不免於臆斷或並存諸說而不能有所折衷今請得一言決之湯之始興實先居於南亳湯地僅七十里夏都安邑而居實在河南偃師乃夏都畿封之域距亳幾九百里湯安得居之及克夏之後平定海內河南之地已入版圖始能遷居於偃師耳括地志宋州穀熟縣西南

三十五里南亳故城湯所都也宋州卽今之歸德府穀熟縣卽在商邱境之東南湯與葛爲鄰葛伯國卽漢志甯陵縣之葛鄉皇甫謐謂湯征自葛始計甯陵去偃師八百里而使亳衆爲耕有童子餉食非其理也今梁國自有二亳北亳在蒙南亳在穀熟然則穀熟湯所都也孔穎達亦知斯言之近理而釋孟子湯居亳必以偃師爲殷都者彼欲曲從鄭氏不得不如此也夫以湯爲專都偃師其誤始于尙書孔傳書序云自契至於成湯八遷湯始居亳從先王居孔傳云契父嚳都亳湯自商邱遷焉故曰從先王居按帝嚳之都孔傳亦止言亳而未實指其所在後人因帝嚳曾都偃師遂以孔傳所稱

之亳爲專指偃師不知帝嚳未爲天子之前亦嘗封于南亳  
元和郡縣志等書確有明證况孔氏書傳出於東晉先儒多  
疑其僞不可據爲典要卽實指帝嚳所都成湯所居爲偃師  
之亳且不可信也而况混言都亳安知所謂亳者非南亳乎  
卽湯都偃師之言眞出於孔安國且不可從也况其爲僞孔  
傳乎蓋偃師之亳卽春秋之鄭地其界在河洛之間未嘗非  
帝嚳之故都未嘗非殷之京邑而以湯所居之國爲卽在此  
則萬無是理何以見之史記吳起對魏武侯曰夏桀之居左  
河濟右太華伊闕在其南羊腸在其北偃師在四者之中正  
夏桀所居之地桀都安邑卽今平陽府之絳州東南距洛陽

五百里偃師西南去洛陽七十里地界鞏洛東有成臯之固  
南有轅轅伊闕之險西連太華嶠函北枕黃河岳鄙夏雖定  
都河北而所以據形勢壯皇居者實在大河以南成臯嶠函  
以內卽洛陽與偃師境也由殷及周皆指此爲夏居周本紀  
武王謂周公曰自洛汭延于伊汭居易無固其有夏之居司  
馬貞索隱曰言自洛汭及伊汭其地平易無險固是有夏之  
舊居夫自洛汭以至伊汭此非偃師之境乎又徐廣引周書  
度邑篇曰武王問太公曰吾將因有夏之居也南望過于三  
塗北瞻望于有河夫偃師所在非卽三塗之北河之南乎夏  
氏所居實在于此所恃以爲固者亦存乎此湯安得奪之以

爲都也明其既有天下始遷此矣不獨此也徐廣云夏居河南初在陽城後在陽翟孟子禹避舜之子于陽城劉熙云今潁川陽城也趙岐孟子註云陽城箕山之陰皆嵩山下深谷中元和郡縣志告成縣本漢陽城縣嵩山在縣西北二十三里陽城縣西北至洛陽僅一百七十里嵩山之下去洛僅一百四十餘里而偃師又在洛陽東北七十里其去嵩山更近是禹所居之陽城實與西亳之地相鄰也漢地理志陽翟下云夏禹國括地志以爲禹所封夏伯蓋禹受封之國在陽翟也故其地今尚號禹州其去洛二百四十里其去偃師不過二百里又太康爲羿所距乃居河南夫一偃師之地既在那

畿之中而有夏一代天子迭居之都又皆羅列於其側帝室京城盡聚此一二百里間而湯能遷都于其際乎是不待辨而知者也曰公劉之遷豳太王之遷岐何也曰非此之比也彼僻處西郵避戎難而遷邊境土曠人稀又無他國爲之問隔故得任其擇居然亦限在一隅不出三百里以內若湯本在中土列國犬牙錯處是時天下諸侯存者尙有三千餘國各私其地各阻其險豈有七十里之諸侯能越他國之境遠出九百里外而定居乎有以知其必不能也然則史記書序所稱湯始居亳不在偃師而在穀熟之南亳審矣然自來解遷亳者不獨亳地有誤并所從遷之商邱亦失之按契至湯

入遷本於史記非書序所創其言最可依據唯是十四世之中八徙國都而湯以前所徙之地可考者僅得其二契封于宏農之商相土居商邱他如契居番昭明居砥石其事皆無可考所足取信者唯商洛與商邱耳而湯仍從商邱遷亳是湯亦先居商邱承相土之舊繼乃自商邱遷亳耳然則自契至湯何得有入遷乎是可知孔傳自商邱遷者不得其實矣書正義辨云相土契之孫也自契至湯凡八遷若相土至湯都遂不改豈契至相土三世而七遷也相土至湯必更遷都但不知湯從何地而遷亳耳必不從商邱遷也此言可謂得間真能疑人所不疑者矣然則從先王居果何指也曰先王

卽指相土也從先王居者穀熟與商邱逼近謂依相土之故都而處耳蓋自契以後再傳而居商邱自相土後國凡數遷必稍遠先王之舊居迄湯之時八遷至亳始與相土之故居相近故曰從先王居也非謂契父帝嚳所都之偃師也如以從先王爲必屬帝嚳則帝嚳之都雖在偃師而初封爲諸侯其國亦在穀熟元和郡縣志穀熟縣云高辛故城在縣西南四十五里帝嚳初封于此樂史太平寰宇記引地理志梁國穀熟西南有高辛城帝系譜帝嚳年五十佐顓頊有功封爲諸侯邑于此是非帝嚳先居南亳之證乎以依相土之境爲從先王之居于史記文意更順卽以從帝嚳之居而論南亳

自有譽之故邑同爲帝譽舊境安見居西亳者爲從先王而居南亳者不可謂從先王耶況偃師之亳湯爲諸侯時斷不能居雖欲從譽而無由也而必以書序之居亳孔傳之都亳爲專指西亳何也是亦惑之甚者也吾嘗遍攷載籍叅之地勢而定湯居爲南亳之地除前所論辨外又得證十有四焉漢甯陵縣東至今商邱縣五十九里穀熟縣西北至商邱五十五里元和郡縣志載之甚明而南亳又在穀熟縣西南三十五里太平寰宇記故葛城在甯陵縣北十五里又云湯居亳今甯陵界有葛城相去八十里是湯都之距葛國僅八十里合之孟子與葛爲鄰之言確然相符證一也史記殷本紀

自契至湯八遷湯始居亳從先王居作帝告湯征諸侯葛伯不祀湯始伐之作湯征其後又云夏桀爲虐政淫荒而諸侯昆吾氏爲亂湯乃興師率諸侯以伐昆吾遂伐桀作湯誓詳味史遷文意前後事迹皆有次序不亂所敘湯之居亳在一征以前匪徒未嘗克夏並其時未嘗征葛何能北至偃師以畿內之境爲都是可知南亳之是而西亳之非證二也國語湯伐桀桀與韋顧之君拒湯于莘之墟元和郡縣志故莘城在陳留縣東北三十五里古莘國也莘地旣在陳留縣陳留西去汴州五十里東與宋州相距二百餘里湯居穀熟自東南而征西北故桀與韋顧之君拒于陳留之莘墟以扼其

衡若自偃師起事渡河郎近安邑豈有變生近畿兵已西入而反拒之于東南之遠地乎益信湯居當在南臺證三也左氏傳云夏啟有鈞臺之饗杜預云河南陽翟縣南有鈞臺陂蓋啟饗諸侯于此元和郡縣志陽翟縣鈞臺在縣南十五里是夏后啟之朝會諸侯在陽翟縣也陽翟爲禹始封之國後有天下遂以此爲會諸侯之所史記言桀囚湯于夏臺皇甫謐以爲地在陽翟夫陽翟去夏都安邑七百餘里爲畿內極遠之地而四方之朝會必集于此啟以之饗羣后桀以之用威刑而况偃師去安邑止五百餘里較之陽翟尙爲畿內之近地而安能使諸侯據其地乎證四也尙書大傳夏人飲酒

醉者持不醉者不醉者持醉者相和而歌曰盍歸于臺盍歸于臺臺亦大矣伊尹退而閒居深聽樂聲遂去夏適湯是湯既居于臺而後夏人慕德有歸臺之歌伊尹聞之自夏復回然則居臺在伊尹去夏之先桀尙未亡湯何能遂居偃師證五也水經注睢水又逕新城北又東逕高鄉城北又東逕臺城北南臺也即湯所都矣又逕睢陽縣故城南又東逕穀熟縣故城北是酈注明以南臺在穀熟者爲湯都證六也漢書地理志偃師縣下云殷湯所都而叔列國風土于宋地又曰湯止于臺穀熟亦宋地也夫既以宋地爲湯所止之臺是班固之意亦不專以偃師爲湯都後儒之主西臺者皆祖述班固地理志

今地理志言湯之居尚不專主西亳其餘紛紛宗偃師者可不攻自破證七也史記索隱註湯始居亳不引地理志之尸鄉湯亭而但引皇甫謐梁國穀熟縣爲南亳湯所都也裴駙亦引甯陵縣之葛鄉以徵史記亳都爲在梁國後漢郡國志梁國穀熟有新城左傳曰文十四年諸侯會新城帝王世記有南亳可知諸家所見大抵相同證八也孔穎達詩正義引中候格予命云天乙在亳東觀于洛以亳在梁國居於洛東不得東觀于洛不知中候言天乙在亳其下卽繼之曰諸鄰國襁負歸德然後乃言東觀于洛夫襁負歸德而謂之鄰國是非湯爲諸侯時乎爲諸侯而居亳非穀熟之南亳而將何

託乎其後言東觀于洛者乃朝桀之後自安邑而歸東觀于洛耳非自偃師而東也孔穎達不詳中候之上下語義獨割裂觀洛一語以助譏評豈知中候所謂天乙在亳者以文意考之其地仍宜指南亳證九也且穎達爲孟子正義旣宗鄭說以駁南亳矣而尙書正義乃並列皇甫士安之說以爲未知孰是是其心亦明知梁國亳都之說爲優故爲兩可之辭而不定主西亳證十也張守節夏本紀正義引汲冢古文云太康居斟尋羿亦居之桀亦居之臣瓚曰斟尋在河南蓋後遷北海尙書序太康失邦次于洛汭此卽太康居之爲近洛也然則太康所居蓋在河南近洛之地又正義引括地志故

鄒城在洛州鞏縣西南五十八里蓋桀所居也夫河南近洛之地既距偃師不遠而鞏縣西至洛陽一百四十里其西南之故鄒城去洛陽較近而去偃師更近是一地者桀嘗親居之則偃師卽爲皇都逼近之區何能使他人立國于其地乎證十一也杜佑通典穀熟漢舊縣卽殷之南亳湯所都元和郡縣志穀熟縣春秋時爲穀邱亦殷之所都謂之南亳太平寰宇記亦言古穀城殷謂之南亳亦嘗都之是雖沿士安之舊而亦足見人心之公證十二也國朝顧祖禹方輿記要誠爲傑思奇構然其論殷之都邑亦宗括地志穀熟西南爲湯都而以偃師之地爲卽位以後自南亳徙都焉證十三也更

可據者殷本紀夏師敗績湯遂伐三豎俘厥寶玉孔安國曰三豎國名桀走保之今定陶也定陶卽濟陰縣漢地理志臣瓚曰湯居亳今濟陰縣是也今亳有湯塚己氏有伊尹塚皆相近然則臣瓚所稱之亳卽北亳也杜預云梁國蒙縣西北有亳城故亦謂之蒙亳亳與薄通其界皆在濟陰縣卽漢定陶之境定陶當夏末之時既爲三豎之國桀敗後尙走保定陶以拒湯及湯伐三豎然後桀棄寶玉而奔南巢湯未克夏時何能據以爲都也是則湯居濟陰之說又不足憑矣而或者謂杜佑通典稱北亳在曹州之考城縣定陶在曹州之濟陰縣疑古三豎之國或專在定陶而定陶西南之考城其地

自爲湯有亦未可知不思考城與濟陰相去亦止數十里其中無險可以固守若湯真都考城築戰敗後不走保他處而特至定陶反依湯所居之國以自速其死乎揆以情事殆不必然然則北亳亦湯爲天子時之所居謂湯都在濟陰縣者固非謂湯都在考城者亦非也夫偃師之西亳湯旣不得而居濟陰縣之北亳又非湯所有之境卽有亦在克夏以後然則湯居亳國非穀熟之南亳莫屬矣證十四也以此十四證斷湯居爲南亳確不可易而亳州舊志乃奮其臆見竟以南亳爲烏有之名于是歷代所傳之二亳竟刪去一亳異矣且謂漢甯陵之葛鄉爲春秋之葛人而決其非葛伯之國抑思

葛國在甯陵縣班固志之司馬彪載之酈道元記之歷世方輿之書眾口一詞莫敢異議今乃以爲非葛伯故國而直指爲葛人此何所據而云然耶至斥趙岐註孟子之誤過矣又據元鳥詩宅殷土茫茫古帝命武湯謂湯始終都偃師之殷地不知盤庚旣遷河南始號曰殷此詩乃殷人祀高宗在盤庚之後故以國號追稱前世統謂之殷土耳安得以後起之名改前時之地而謂湯之亳都卽爲殷土是歷代之史志不如一人之意見矣有是理乎余非好爲論辨乃據古人之言核當日之情勢參之以各國之地形必皆信而有徵世多通儒願以此言質之可也

或曰南亳既得聞命矣敢問孔穎達謂史記湯始居亳從先王居作帝誥其文在湯征諸侯伊尹去亳之上遂以居亳爲商有天下湯征諸侯以下乃事後追錄然乎曰今姑不與深辨卽以孟子折之孟子稱湯居亳與葛爲鄰是定居于亳在與葛伯相交之先是時湯固一諸侯也因居亳而後與葛國相近因近葛而後有往耕饋食之事因饋食而後有攻奪之事因爲童子復仇而後有征葛之事所敘諸事皆在湯居亳以後今謂遷居于亳乃商有天下之事湯征及汝鳩汝方乃事後追錄之辭然則湯先有天下定居于亳而後與葛伯爲鄰乎且湯十一征始有天下初征卽自葛國今謂居亳乃在

既有天下之時然則湯先得天下而後十一征乎此真說之不可通者矣夫湯不居亳不得與葛爲鄰不征葛伯及諸侯不能有天下孟子敘事之法與史記次第皆同孔穎達顛倒史記文意而孟子湯居亳與葛爲鄰之言遂不可解所失非淺鮮也是知湯居亳斷在爲諸侯之時與葛爲鄰斷在南亳之地孟子史記真不我欺正不必牽改馬遷立言之序以就已說也夫班固爲西亳說之所祖而固之言亳亦前後異議而不徒在偃師孔穎達乃善攻言南亳之人而穎達釋經亦彼此殊辭而不能力排穀熟可見理有固然心有同是雖異己者莫之或奪學者于此可以知所從矣

曰孔氏穎達以居亳爲商有天下之事既明辨其非而知其失矣然云自契至湯諸侯之國而得數遷都者蓋以時王命之使遷意者湯之遷亳或亦奉時王命乎曰斯言也出于意揣不但事無明文卽或有之亦斷無居偃師之理况桀方積怒于湯召而囚之久之乃釋何得有遷都之命也是則孔說之不可從者矣然必謂湯始終皆都南亳而無遷居偃師之事此亦皇甫士安之偏夫論古者貴折衷于至當是故西亳之說不盡非然遷都當在既有天下之後而不可以論未有天下之前南亳之說雖全是然定居實在爲諸侯之時而不可以論爲天子之日如此則居亳之解各得其平矣夫是此則非彼乃說經攷古者之通病竊不敢效也

或又曰湯始居穀熟繼遷偃師南亳西亳各得其解唯是北亳之得名果何自也濟陰之蒙亳旣非湯所得而都而北亳之稱何以加之蒙縣耶又皇甫謐以北亳爲商所受命三亳同爲湯居何以北亳爲受命之地此其故亦不可通願聞其畧曰其詳蓋不可考竊于史記得之殷本紀言湯伐桀桀敗于有娥之墟奔于鳴條夏師敗績湯遂伐三叟俘厥寶玉義伯仲伯作典寶蓋湯伐桀時夏師敗績桀雖戰敗而地未全失夏祚尙未亡也桀於是乎奔至三叟走保濟陰之定陶以圖僥倖及湯又伐二叟桀勢窮力屈乃棄其寶器而南奔于

巢湯因而放之蓋至是天下始定而夏亡矣夏于此時亡湯  
卽于此時興其機全在三變之克三變卽定陶地克定陶而  
四海乃一大命始集于躬故後世遂以濟陰之亳爲湯受命  
之地也湯旣勝夏于濟陰俘其寶玉四方諸侯畢至湯于是  
卽其地大會諸侯故括地志以亳爲湯所盟地也夫湯伐三  
變而俘寶玉本在濟陰克夏而受天休命亦在濟陰朝會諸  
侯又卽在此濟陰其後卽天子位遂以此爲受命之重地駐  
輦之京邑是則濟陰之稱亳都有自來矣此北亳所以得名  
歟然未克三變以前濟陰尙屬他國之地何能便爲亳都也  
舊志疑南亳而信北亳不知何謂吾故爲之斷曰南亳者湯

爲諸侯時所居之國也西亳者湯爲天子時所遷之都也北  
亳者湯克夏時所會諸侯之地也三家所據各有其是亦各  
有所偏今爲考其源委證其異同叅之于衆家核之以經傳  
庶幾三亳之說各得其條理而不至相格矣

曰三亳之論旣定人皆知湯居爲在穀熟然穀熟旣省入河  
南商邱縣境先輩諸家及舊志皆以爲與亳州無涉然乎曰  
非也穀熟之南境與今亳州接壤酈道元之言可徵按水經  
注渦水又東逕陽夏縣西又東逕鹿邑城北又東逕武平縣  
故城又東逕廣鄉城北渦水又南東曲逕苦縣故城南又北  
逕老子廟東又逕譙縣故城北後漢郡國志武平下引左傳

成十六年諸侯侵陳鳴鹿杜預曰縣西南有鹿邑是鹿邑卽  
在武平縣境武平在鹿邑東北渦水過鹿邑廣鄉卽東逕苦  
縣譙城已在今亳州之地攷商邱城距鹿邑界僅七十里而  
譙城在商邱鹿邑交界之區正與當日之穀熟逼近安得謂  
湯都之南亳于州境無涉乎且以道路計之今歸德府之商  
邱縣卽古之睢陽也穀熟故縣在睢陽東南四十里今爲穀  
熟鎮括地志所稱南亳故城又在穀熟縣西南三十五里是  
湯所居之亳北去商邱已數十里矣而亳州北去商邱止一  
百二十里其距南亳計不過數十里而元侯有造孝烈將軍  
祠像記將軍名木蘭亳之譙人睢陽境東南距八十里曰營

郭卽古亳方域孝烈之故墟也接營郭今爲營郭集在商邱  
東南七十里侯有造以爲卽古亳方域孝烈之故墟孝烈譙  
人而故居在此可見營郭之地今屬商邱者昔皆屬于譙境  
而東鄰界溝西至宋家集北近杏岡鎮者俱當爲亳州之地  
而譙郡北距商邱之界蓋不止五十里之士牆村矣夫州治  
之去南亳止數十里而亳州之北界且越數十里而有餘然  
則南亳不卽在亳州境乎夫穀熟旣省入睢陽則譙以北之  
境去睢陽愈近則所占穀熟之地愈多安見今日商邱之地  
非昔日穀熟之界耶安見昔日穀熟之界非卽昔日亳州之  
地耶况南亳之北去穀熟三十五里其南境所及距穀熟蓋

不止三十餘里何以見之括地志言南亳故城在穀熟縣西南三十五里而史記正義所稱南亳之治其距穀熟之里數即不相符如樊噲傳從擊秦出亳南正義曰亳故城在宋州穀熟西南四寸里貨殖傳湯止于亳正義云宋州穀熟縣西南四十五里南亳州故城是也夫括地志為唐魏王泰所撰張守節亦係唐人何以言之南亳里數或曰三十五或曰四十又曰四十五同在一時里數宜無廣狹之異而湯所都南亳至唐時已二千餘年且在平野兵火之地斷無故城之可指大約穀熟西南自三十五里以外四十五里以內皆為古南亳之境是以前備言南亳故治或彼或此互有異同耳

于此見南亳之治去穀熟愈遠則與亳州之治愈近夫商邱營郭集以北皆古時之譙境今州界距商邱境止五十里南亳距穀熟四十五里則不徒在昔時亳州之境并在今亳州數十里以內之界矣而何得謂南亳之地不在今亳州乎夫有意附會古人之迹固失之鑿憚考索之功于古迹之疑難者悉置之不論而以爲與此無涉是亦畏艱節勞之一術也竊所不取

周初時為焦國武王封神農之後于此通典譙縣下有古焦

城按杜佑通典及馬端臨通考皆以武王所封之焦為在此地史記注引漢地理志宏農郡陝縣之焦國當之不知陝

縣之焦乃姬姓之國見于春秋傳不得為神農之後也當以通典之言為據辨見沿革

焦夷春秋時為陳國焦夷二邑地

許男遷此春秋傳楚滅陳後遷許于夷

徐子居此春秋傳吳滅徐徐子奔楚楚城夷而處之按許徐

居之地在今亳州東南之境即故城父縣也

秦漢時為譙縣唯封尹恢時暫為侯國旋廢

後漢豫州刺史治譙按光武即位復武帝十三州之舊置于

置刺史于此察郡國之得失自是譙始為重地

魏為譙郡又為譙都見黃初二年詔是為五都之一

晉為譙國又為譙郡南渡時亦為豫州刺史治按祖逖始以

譙永嘉亂後司兗諸部盡陷于石勒唯譙城獨存實賴祖逖鎮撫之功後謝奕袁真皆以豫州刺史戍譙未嘗不恃此為

重地但不

久旋失耳  
元魏立南兗州于此以刺史鎮之領郡七縣二十一見魏地

形志按魏以豫徐二州民稀上曠乃擇南北之形要立南兗州于譙置刺史以鎮之緩撫邊民以耕以戰據形勝以

扼過淮終劉宋之世不能保全淮西之地者以魏人置州于

譙有以奪其勢也淮西既失則淮北四州之地亦不能自存

甚矣地利之  
北齊因魏之舊譙仍為南兗州刺史之治

關于人國也  
後周置總管府于此楊堅始為之始有亳州之名

唐初亳州置總管府又號都督府旋罷仍為亳州時天下州府

有十望亳州居十望之一按襄宇記唐武德五年置總管府

為都督府貞觀元年罷都督府亳州不改是唐亦置總管府于此但不久即廢耳

朱梁得亳州置宣武軍以亳合潁宋其隸一節度較之唐中葉之方鎮其所治之地廣矣

梁開平二年升亳州為防禦州後唐為團練州晉復為防禦州宋升亳州為集慶軍置節度使所統者七縣之地

金以亳州為節鎮按靖康以後亳地入于金金以亳為節鎮領縣六鎮五屬南京路

元張柔移鎮于此以山前入軍城而戍之積兵運餉以是為

要區迄元末政衰羣豪攘臂劉福通遂奉韓林兒僭號于亳

雖鴟張狼顧之雄不足為地輕重然明祖資之遂成帝業驅

除啟聖要亦數之非偶者矣按亳在三代聖迹所興君國迭建由秦迄漢降為縣邑漸以不

振至東漢之初始立豫州刺史部于此而譙遂為鉅治至魏交創業而譙遂為王都魏晉之間宗室受土封者後先接踵

自晉迄六朝南北交爭各倚譙為重鎮得之者強失之者弱隋唐而後車書混一兵革不興亳州地望猶等于大郡宋有

天下以逮金元亳州復為節鎮自元中葉下及于明民少境併幅員彌蹙而亳遂儕于州縣之列雖地有盛衰亦庶為之


也夫亳之為州地平壤厚得中土之和氣百物以蕃家庶以集在危時則為羣雄角逐之場在昇平則為人物輻輳之地

稽其水陸所至固淮西一郡會也太史遷之叙貨殖于通衢名都必著明其地俗况亳境四達英豪間出揚芬于往葉流

譽于來茲可以徵王迹焉可以觀霸圖焉文采武畧于斯為盛五方之產不期而畢會南北所需取給于立談豈非古之

所謂通都大邑者耶以其為聖迹所興君國迭建且又歷代建節之所不尋常之州縣也故列都邑于沿革之前而

以在制附焉



沿革

亳州爲禹貢豫州之域在春秋時爲陳國之焦夷二邑杜佑  
通典稱武王克殷封神農之後於焦卽亳地也其後焦入於  
陳至楚改名曰譙按漢書地理志宏農郡陝縣故虢國有焦  
城故焦國史記正義引此文以釋武王所封之焦江南通志  
遂據以斷焦不在亳攷河南陝縣之焦乃姬姓之國神農之  
後並非姬姓灼然其見左傳襄二十九年晉女叔侯曰虞虢  
焦滑霍楊韓魏皆姬姓也杜預曰八國皆晉所滅太平寰宇  
記陝縣云故虢焦二城爲晉所滅宏農郡之焦旣爲姬姓安  
得以爲神農之後乎然則武王所封之焦斷在亳地信而有

徵通志誤矣焦國既併爲陳邑春秋時楚成得臣伐陳取焦夷昭公九年楚遷許于夷三十年吳滅徐徐子奔楚楚城夷而處之是城父入楚後兩居小國之君楚自平王時焦邑已改號譙何以見之太平寰宇記載譙縣有獨母塚昔楚平王築譙城而薛母賑城夫卒後各益其土而大其墳由此觀之楚平王時已稱爲譙是譙之得名不自秦始皇矣

秦漢時亳界頗廣兼有譙與城父之地秦爲譙縣史記葛嬰攻譙下之城父之名往往與潁川之父城相亂史記王翦傳李信攻鄢郢破之引兵而西與蒙恬會城父正義引水經注云楚大城城父使太子建居之十三志云太子建所居城父

謂今亳州城父是也譙與城父在秦屬泗水郡至漢屬沛郡城父或暫爲國尹恢封爲城父侯是也通典元和郡縣志寰宇記及方輿記要皆以爲秦屬碭郡不知碭郡所治之境在漢屬梁國漢之沛郡卽秦之泗水郡譙與城父旣同屬漢之沛郡則在秦屬泗水郡無疑也漢沛郡領縣三十七譙與城父皆隸其中王莽竊位改譙縣曰延成亭改城父曰思善光武旣興仍立十三部而亳州遂爲豫州刺史所莅之地故司馬彪郡國志譙縣下有刺史治其境較之前漢廣于北而隘于東南按通典云十三部不常所治後漢司隸治河南豫治譙今亳州鄆縣夫亳之鄆縣旣統謂之譙然則譙蓋兼有鄆

縣之境也鄴在譙之北是非所謂廣于北者乎後漢郡國志譙縣屬沛國城父縣屬汝南郡一亳州之地分而兩屬城父在譙東南城父既別屬汝南是亳之全境已割去東南一半矣是非所謂隘于東南者乎譙兼有鄴地不過鄴縣之南境而城父改屬則少一邑之地以視西漢之境似爲稍蹙也

魏武始分沛國立譙魏文帝黃初二年以譙爲先人本國與長安許昌鄴洛陽號爲五都又以譙以下七縣屬譙郡晉因魏制所統之縣仍七曰譙曰城父曰鄴曰山桑曰龍亢曰蘄曰鉅永嘉之亂譙爲流人塢主張平樊雅所據祖逖克平之元帝爲晉王時石勒將石季龍圍譙城平西將軍祖逖擊走

之明帝永昌元年石勒攻陷襄城城父遂圍譙破祖約別軍約退據壽春譙遂沒於石氏成帝咸和八年石勒死其將石聰以譙來降於是亳地復歸於晉後謝萬北伐軍潰譙沛及諸郡復陷于慕容燕苻秦滅燕盡有其地譙入於秦及苻堅敗後晉乘機北伐孝武甯康九年龍驤將軍劉牢之克譙城十二年翟遼寇譙龍驤將軍朱序擊走之譙賴以全蓋永嘉亂後豫州惟譙尙存祖逖既沒譙陷於石勒勒死譙始降晉自後豫州刺史每屯治於譙以固邊鎮而晉書所敘南渡之事于譙地多未指明按沈約州郡志升平元年刺史謝奕戍譙而晉穆帝紀升平元年但云以軍司謝奕爲使持節都督

安西將軍豫州刺史而已又州郡志隆和元年刺史袁真自譙退守壽春而袁帝紀但云袁真自汝南退鎮壽陽夫爲豫州刺史卽畀以戍譙之任汝南與譙相去本不甚遠然不經標明孰知其所指者實在譙地余故爲詳核以陳之况晉書出於唐房喬等所修自不如梁沈約之言爲可據也

自魏晉以來譙之名稱最繁或爲郡或爲縣或爲國或爲都其先止稱曰譙晉及六朝多稱爲譙城又有北譙南譙之名南譙與此無涉又有譙州之稱又別有譙縣其稱譙城也除前所引外如祖逖傳率衆追討遂克譙城穆帝紀殷浩棄輜重退保譙城藝術傳戴洋謂祖約曰十月必有賊到譙城東

沈約州郡志刺史祖約始自譙城退還壽春魏堯雄傳樊子鵠討元樹於譙城平之其他類此者甚衆不能枚舉此譙城之可徵者也北譙有二一爲譙郡之譙今亳州是也一爲蒙縣之北譙今歸德府北四十里是也亳州稱爲北譙因南譙而得其實晉末之北譙已在蒙縣不在亳州沈約宋書所稱北譙卽蒙縣之譙也晉書地理志晉成帝僞置陳留郡於北譙界尙爲亳州之譙也南譙之名有二一爲山桑之南譙今潁州府之蒙城縣是也一爲山桑寄治之南譙今巢縣東南二十里有南譙城是也二者俱無關於亳州又譙州亦有三一今亳州稱爲譙州梁書武帝本紀改魏南兖州爲譙州

是也一渦陽卽蒙城縣元和郡縣志梁於此置西徐州入魏  
改爲譙州是也一唐臨渙本漢鉅縣元和郡縣志隋開皇三  
年改置譙州神堯常爲譙州刺史是也又別有譙縣乃亳之  
流民寓于荆土故僑置縣以處之宋書州郡志晉成帝咸康  
三年征西將軍庾亮以司州僑戶立是時譙縣與松滋並置  
凡有八縣皆屬於僑置之河東郡人則譙人地非譙境此譙  
縣之別見者也雖非亳地而亳人被難者皆居其土不可不  
標出以資考核是故一譙地耳名號錯出如此其繁展轉稱  
述易致混淆所宜詳辨以示將來焉曰譙之詳則聞命矣敢  
問城父自春秋以下後五代以前並無他稱何也曰城父自

周以迄唐末本無別名王莽時暫改旋復不足爲據唯其地  
有蒯鄉見于史記注按史記周緤傳蒯成侯緤者沛人也索  
隱曰蒯鄉名按三蒼蒯鄉在城父縣此蒯鄉爲城父之地可  
知括地志又引輿地志以蒯成爲在陳倉夫周緤之封果在  
城父與陳倉均未可定然因索隱之言足徵亳地有蒯鄉之  
名而前此未嘗及之斯亦亳人所當知者矣

宋武帝劉裕奮其雄略北定河南由是豫州寄至睢陽兗州  
得治滑臺先是晉成帝咸康四年於譙界僑置陳留郡魏書  
地形志云南兗州治譙城領陳留郡所屬之縣有小黃浚儀  
小黃下云劉裕置魏因之有曹騰墓曹嵩墓鄧艾祠浚儀下

云有城父城說者遂以爲劉裕因晉之舊中原地陷僑置陳留郡於譙並改譙縣爲小黃改城父爲浚儀不知晉成帝之僑置陳留郡因遺民流戶而立耳劉裕開拓豫土與晉末之時勢固自不同沈約州郡志於兖州云永初罷國有東魏陳留三罷永初乃劉裕初卽位之年號可見劉裕之時陳留罷本在兖州其故境安然無恙何必於譙置陳留罷也揆以情勢實所未解舊志沿革表據州郡志陳留太守寄治譙郡長垣縣界不知沈約雖有此言而上文明云永初郡國屬兖永初時陳留郡屬兖今州郡志譙郡之長垣縣實屬豫州境兖州之陳留何反置於豫州耶是必有說以處此矣况州郡志

敘譙郡太守下云永初郡國無長垣縣是劉裕時長垣縣尙不屬譙郡何得云僑置陳留於譙郡耶更可異者長垣卽古衛之匡邑唐爲匡城縣郡國志元和志皆無異辭杜預亦云匡在長垣縣西南其地隸滑州北邊黃河尙在漢陳留郡之北南去汴州且一百一十里豈有南渡僑置之郡反徙而近北乎然則魏書以改小黃爲譙爲劉裕所置何也曰是有故也自晉遷江左兖豫諸部盡覆於敵豫獨存譙凡開封府以東歸德府以西漢時陳留郡之地盡非晉有雖成帝復置之陳留郡自謝萬潰師以後地與流戶復陷於燕當此之時譙已失矣何有于寄治之陳留及劉裕崛起北平廣固西克長

安盡有河南之地於是始置司州兗州又僑置河內郡東京  
兆郡於河南陳留所屬小黃酸棗浚儀等縣皆已失而復得  
郡縣之名俱由宋武更立故魏書以爲劉裕置之也其陳留  
初屬兗州繼屬豫州泰始以前地未陷沒而必以陳留移於  
譙郡小黃置於譙縣浚儀置於城父又何也曰魏晉以降郡  
國以譙名者皆領譙縣在今之亳州劉宋所立之譙郡實在  
梁國之蒙縣故沈約州郡志譙郡太守後首列蒙令蓋所理  
者在蒙縣也蒙在睢陽東北四十里譙郡既移於梁之蒙縣  
所領之縣有五唯蘄縣尙爲譙郡之故屬此外如襄邑長垣  
於魏皆屬他郡蒙與甯陵本屬梁國宋皆併歸於譙而梁郡

太守所領者唯下邑與碭而已譙之治移於梁而亳州故治  
遂虛故陳留之治得移於此于是譙縣始改爲小黃城父始  
改爲浚儀此當日之情勢如此也曰劉裕奠河南之全境陳  
留郡之地具存其不還故治而必長治譙者何也曰以州郡  
志攷之武帝平定關洛置司州刺史治虎牢領河南滎陽宏  
農三郡滎陽郡所領有成臯開封武帝初沒魏人已攻陷滑  
臺少帝時司州全沒於魏成臯開封已入北庭矣陳留西去  
開封止五十里開封既失陳留無地可存勢不得不寄治於  
譙况文帝元嘉末司州尙僑立於汝南而陳留長寄治於譙  
何獨疑乎曰州郡志北譙郡屬豫州而宋書晉恭帝元熙元

年以徐州之北譙與諸郡增爲宋國進宋公爵爲王何以譙郡又屬於徐州也曰無疑也晉司兗青冀全陷於劉石矣沈約明云徐州尙有過半豫州唯有譙城北譙治蒙縣本與徐州相近因豫僅有譙城不足以名州唯徐州封域尙有過半故以北譙屬徐州且宋武本徐之彭城人故名郡多隸徐州厥後受禪之二年分淮東爲南豫州分淮西爲豫州而北譙乃始屬於豫州其後因之不改故宋書州郡志遂列於豫州耳秦始時子勛爲亂奸臣外叛遂失淮北四州及豫州之淮西地所謂四州者徐兗青冀也所謂淮西者汝南新蔡譙梁陳南頓潁川汝陽汝陰諸郡也淮北淮西旣陷于東魏於是

宋與魏以淮爲界矣

元魏正光中置南兗州以譙爲重鎮按魏書范紹傳詔以豫徐二州民稀土曠令紹量度處所更立一州紹以譙城形要之所立州爲便遂立南兗州治譙其郡縣之名一因宋陳留小黃浚儀之舊按魏地形志所列陳留郡乃真漢譙縣之境所列譙郡乃漢梁國蒙縣之地是魏譙郡之治亦因劉宋之舊也魏志於譙郡雖未明言而參考互稽自可得之舊志沿革表於魏之陳留郡譙郡以爲並立而不能辨別其地之所在似未得爲考據之精也

蕭齊時沔北淮南皆失何有於淮西之譙城梁武帝中大通

四年正魏後廢帝中興元年時魏有內亂南兖州州民王迄  
德逼前刺史劉世明以州降梁梁以世明爲刺史改南兖爲  
譙州後又使其將入據譙城其後魏將樊子鵠大破梁軍於  
譙城擒梁將元樹自後譙城遂爲魏有東魏旣衰高齊受禪  
時亳入於齊陳霸先雖有江東境之所及始終以長江爲限  
故東魏以後亳地終屬於北齊舊志云入北齊無攷按北齊  
助叱干苟生以儀同鎮南兖州周帝破鄴苟生死之是譙在  
北齊仍爲南兖州以重臣鎮守其因魏之舊可知又五代通  
錄稱小黃爲北齊所廢然則小黃之廢不始於隋一因一廢  
皆有書可證何云不可攷乎

後周武帝平北齊南兖州入於周置總管府以柱國楊堅爲  
之宣帝大象元年亳與河陽相豫青徐諸總管受京府處分  
是時始改譙稱亳取南亳以名州通典云後周改爲亳州兼  
置陳留郡隋開皇初郡廢總管府亦廢十六年析小黃分置  
梅城縣十八年改浚儀爲城父大業三年改州爲譙郡改小  
黃爲譙縣併梅城入焉

唐地理志王世充於城父置成州世充平卽廢武德三年於  
魯邱堡置文州并置藥城縣四年州廢爲文成縣七年省入  
城父貞觀八年仍改郡爲亳州開元中定天下州府有十望  
亳其一也天寶元年又改爲譙郡刺史爲太守肅宗乾元元

年復爲亳州領縣八較前無永城而有臨渙朝城焉唐方鎮表亳與陳潁隸淮西節度使乾元二年亳州隸陳鄭節度使上元二年亳州隸滑衛節度使代宗廣德元年改號滑亳節度使大曆七年改滑亳爲永平節度使德宗建中二年亳與潁宋合爲宣武軍此亳州後先列於方鎮者也天祐二年更名城父爲焦夷以古二邑之名而被之一縣之地五代史梁又改焦夷爲夷父置防禦州後唐仍改夷父爲譙縣置團練州至晉仍置防禦州蓋自天祐以後城父之名始改自周至天祐幾二千年而後名稱方變自改焦夷後古名與今稱互爲混淆而譙與城父彼此相亂然同爲亳州之境則一也

宋時亳屬淮南南路後屬淮南東路真宗幸亳升爲集慶軍置節度使統縣七靖康以後地沒於金高宗紹興九年議和金歸亳州旋以金人來侵知州王彥先叛屬於金金因宋之名封爲節鎮領縣六鎮五屬南京路理宗時孟珙會元師滅金以陳蔡分界未幾復爲元人所取元有中國亳州屬汴梁路憲宗四年張柔移鎮亳州以山前八軍城而戍之世宗至元八年亳與宿邳及徐割隸歸德府所統縣有六以民戶稀少併城父入譙衛真入鹿邑穀熟入睢陽鄆入永城後又置城父亳領縣僅三惟譙與城父及鹿邑而已明洪武中省譙縣入亳州廢城父縣隸鳳陽府尋降爲縣屬河南歸德州洪武

六年改隸潁州孝宗宏治九年仍屬鳳陽府  
 國初因明之舊雍正二年督臣查弼納奏升亳州為直隸州  
 以太和蒙城來屬十三年又准安徽撫臣王紘之請升潁州  
 為府而以亳為屬州隸潁州府此歷代建置之大略也余詳  
 為探索窮其疆域離合之由辨其後先沿襲之誤以俟君子  
 之採擇焉

建置沿革表

周	商	夏	虞	唐	時代	統部			
豫州	豫州	豫州	豫州	豫州					
					專轄		南亳	焦	陳
					州縣			焦	夷
								譙	楚

秦

漢

新莽  
附

東漢

河南

泗水郡

又為  
碭郡

沛郡

沛郡

豫州

穀邱

城父

譙縣

城父縣

譙縣

穀熟縣

城父縣

延城亭

思善亭

鄆縣

三國  
魏

晉

豫州

沛國

汝南郡

譙郡

又為  
譙郡

譙國

又為  
譙郡

譙縣

城父縣

譙縣

城父縣

鄆縣

山桑縣

龍亢縣

蘄縣

鉅縣

譙縣

南宋

豫州

譙郡

城父縣

鄆縣

山桑縣

龍亢縣

蘄縣

鉅縣

小黃縣

浚儀縣

蘄縣

蒙縣

南齊

豫州

譙郡

寧陵縣

梁

豫州

譙郡

陳

豫州

譙郡

北魏

南兖州

譙郡

譙州

陳留郡

北齊

南兖州

陳留郡

北周

南兖州

南亳州

浚儀縣

小黃縣

寧州志 卷一 沿革表 五五

後周 亳州  
隋 豫州

陳留郡  
譙郡

唐 河南道總管府  
宣武軍都督府

亳州  
譙郡

小黃縣  
梅城縣  
城父縣  
譙縣  
成州  
文州  
藥城縣  
文成縣  
城父縣

後梁 宣武軍

亳州

亳州防禦州

後唐 亳州團練州

後晉 亳州防禦州

後周

亳州

宋 淮南路

亳州

永城縣

臨渙縣

朝城縣

焦夷縣

夷父縣

譙縣

金 元

淮南東路  
集慶軍

南京路

汴梁路

亳州

亳州

歸德府

以下各縣初隸  
亳州後  
改府屬

城父縣

譙縣

衛真縣

鹿邑縣

穀熟縣

睢陽縣

鄆縣

明

國朝

南京

河南省

南京

江南省

江南安徽省

鳳陽府

歸德州直隸州

潁州直隸州

鳳陽府

亳州直隸州

潁州府

永城縣

亳州

亳縣

亳州

太和縣

蒙城縣

亳州

歷朝建置互異  
僅據可考者約  
略列表餘姑闕  
如俟考明另補

形勝

境大貨穰體視大邦

平原曠野土沃壤饒四通八達而無崇山巖谷之險阻

亳爲中州門戶南北交途東南控淮西北接豫

渦河爲域中之襟帶上承沙汴下達山桑百貨輦來於雍梁

千檣轉輸於淮泗其水陸之廣袤固淮西一都會也

亳州之地南北之腰膂稽之往策未嘗不以此爲扼要昔楚

之窺吳也師豫章而次於乾谿圍徐懼吳亦次乾谿蓋經行

頓舍進退應援惟此爲便泊乎孟德自以先世本邑地關衝

要往往治兵於譙以圖南侵不旣篡位遂建陪都其後有事

江淮輒頓舍於此晉祖逖志清中原招攜懷遠藉為根本及桓温伐燕亦必自譙而北拓拔蠶食淮南以譙為重鎮唐平輔公祏以一軍自譙而南朱温盜竊之雄初得宣武即屯據亳州而東方諸鎮供其吞噬况譙梁水道昔尤重之蒙古張柔通輓運築甬道實為扼制江淮之勝算豈非地利有必爭乎蓋亳居豫徐揚三州之中非獨一隅之利害也

蔡必達云亳雖僻在一方實南北通衢中州鎖鑰

亳之形勢以城北為最重古譙地脈之根基也當元張柔朔建亳城而城北樹林之豐蔚地氣之雄厚允稱州之盛今考地勢自北關過河而北有岡綿延連亘數里舊稱虎頭岡



蓋州之來脈迤邐自西北而下至此將渡河過峽故蓄勢起埂并力入城其南離關里許亦有土岡大然作案俗亦謂之虎頭岡更前為五里岡環立五墩非陵非阜舊志傳為曹操虛糧塚今俗稱為曹操堦堆然亦安知非天生之小阜疊立於前以壯形勝耶台之東臺西臺夾峙拱衛皆斯城之擁護也

任志按亳四周平坦無崇巖巨壑為之問隔似無險之可言然平壤之地以水為險過河據上流之重其勢下臨夫

山桑懷遠足為淮北之屏蔽肥河界沙潁之衝其勢橫連夫陳蔡淮潁足為汝南之門戶古之善攻守者北扼泗水南

春以上之水運不通南出肥流則周家口以下之舟師可截蓋水陸之衝形有必爭不盡在重嶺絕澗也又亳之境東北

連宿州一隅之地為徐兗之咽喉南有雙溝一鎮之形關豫揚之利害此有心地利者所當熟圖之也



70001082

